

Ambil peluang jalankan perniagaan secara online

SEJAK kebelakangan ini, perniagaan secara online sangat popular dan semakin digemari oleh masyarakat seiring dengan peningkatan serta perkembangan dalam bidang teknologi.

Sektor perniagaan online dilihat menjadi lubuk emas kepada individu yang mengusahakannya jika ia dijalankan dengan baik.

Timbalan Dekan Penyelidikan dan Jaringan Industri dan Masyarakat, Fakulti Ekonomi dan Pengurusan, Universiti Putra Malaysia, Prof. Madya Dr. Azmawani Abd. Rahman berkata, perubahan dalam sosial

ekonomi dan teknologi menyaksikan sektor itu bertambah hebat dari semasa ke semasa.

Menurutnya, masyarakat di luar sana harus mengambil peluang yang ada untuk menjalankan perniagaan online kerana ia tidak memerlukan modal yang besar.

“Berbanding kita membuka kedai untuk memasarkan sesuatu produk, pasarannya agak terhad. Namun, pasaran untuk perniagaan secara online ini lebih meluas.



AZMAWANI

“Maka, tidak hairanlah peniaga berskala besar juga mengambil kesempatan untuk terlibat sama dalam perniagaan secara online kerana kebolehpasaran yang luas,” katanya.

Tambahnya, selari dengan perkembangan perniagaan online itu, ia turut membuka peluang yang besar dalam bidang

penghantaran dan logistik.

Bagi memenuhi permintaan pembeli, semakin ramai individu berpeluang untuk menyediakan perkhidmatan penghantaran

barang yang dibeli.

Azmawani berkata, bagi memastikan seseorang itu terus berdaya saing dalam perniagaan online, aspek kualiti produk itu harus dititikberatkan.

“Untuk kelangsungan perniagaan, inovasi dalam penambahbaikan kualiti produk perlu sentiasa dilakukan bagi memberi kepuasan kepada pengguna.

“Selain itu, maklum balas yang positif daripada testimoni yang menggunakan sesuatu produk itu juga penting untuk ia terus berada dalam pasaran,” jelasnya.